

Zenesis

**Oñap God abanapur añap matut tahan añarab
brevovai tair toh-ñetio**

Bodor 1:1-2:4

Oñap God hamarrah ma abarah nonairnai hezatü matut
tah-ñetio

Met batam Oñap God nenap heh. Met porah hamarar dañer rop, ma hamarrah nonairnai map petev hezatü, ma boloholor añarab bon, ma iverir iv havevor iv havevok hezari map bon, met abarar gitapur ñonisir zeizañ map bon heh.

Bon hehan Oñap God abarar hamar matut tapanez homeh. Homet matut tahan iv haveo hamarrah bamezat hehan kutur manat heh, met porah Oñap Godiz Pulio map korav ravat heh. Tahaek Oñap Godih "Al tez," hahan al teh, povoz alizas main kuturut main ravat heh. (2 Kor.bodor 4:6)

Met aliz mamogas bon tahan aliz zeirevaizasik iv haveo map bamezat hehaek Oñap Godih pot mañah, "Iv nao revah unis ravat hep, met iv nao irih hamarrah hep." Pot mañahan taput tah. (2 Pit.bodor 3:5)

Met au aliz nasikaro bon tahan zeirevai Oñap God hamarar iv haveo bamain batah. Tahapuh hamarrah zir bi nonairnai berevat parum uloñ ñodapanepuh berevohopanez matut tah. Matut tahapuh Oñap God etet parum tohopazat pi "Tinaharam matut toh,"

pot homeh.

Met au alizañ 3 bon tahan zeirevaizasik Oñap God gitapur ñonisir zeizañ matut tat abarah haeñ tohopanez povoz kuturutar alizas, ma utarar hadao, ma adasir avas ñedeokaz kapot paruh añairohopanen etet hodad ravat tohokaz au mañat meñeh. Met Oñap God etet parum tohopazat pi "Tinaharam matut toh," pot homeh.

Met au alizañ 4 bon tahan zeirevaizasik Oñap God iverir iv havevok anumai hezari matut tahapuh pot mañah, "Arim ñarohol bathopiken map iverihar havevok berevat belez ravohop." Pot mañahapuh Oñap God idehol matut tahapuh maot pot mañah, "Arim ñarohol bathopiken map hamarrah berevat belez ravohop," pot au mañah.

Met au alizañ 5 bon tahan zeirevaizasik Oñap God hamarrah anumai map hezari, ma hamaleholor anumai bedeholor anumai zeitakari matut tah. Tat abanapur añap matut tah. Tahapuh Oñap God parupin mañah, "Ari gogov tat hamarrah gipiz berevat hezatü nohopik. Tat ari naenap bat ñarohol bathopiken map ham eparah berevat rekö ravat hep," pot mañah. (Mat.bodor 19:4; Mak.bodor 10:6)

Met añarab anumaiholoz zut bon, oñ parum hepazao Oñap Godiz zut hez-pot homevai sohopanez matut tah. Tahapuh hamarrah nonairnai hezatur anumai hezariz abanap korav ravapanez meñeh. Tat pi mapotun etet parum tohopazat "Ne tin tat matut toh," Oñap God pot homeh.

Met alizañ 6 bon tahan Oñap God nonairnai abarah ma hamarrah hezatü map matut tat gar hah, met zeirevai pim gog epov bon tah, povoz nonairnai potun et bameh-porah pi gogot maot nat, oñ pot homeh, "Ne gog epov map tin matut tat gar hahö, povoz aliz epes ne bamain batoman nem aliz tinas ravat hepan." Pot pi homehapuh aliz posik zagī ravat heh. (Ib.bodor 4:4,10; Eks.bodor 20)

Bodor 2:7-25

Oñap God abanapur añap kapot tat matut tah-ñetio

Met abanap matut tapanez Oñap God pot tah. Hamar bahapuh abanap garos matut tahapuh pim gizaroponañ bat gelañik pul menahan abanap bal hah. Tahan pim abatao Adam mañah. (1 Kor.bodor 15:45)

Tahapuh Oñap God zeï tinas, zenzeneñ bonoek, matut tat gipiz tinas bit poek aban pop korav ravat hepanez au mañat meñeh. Met zeï tin posiz abatao Iden pot mañah.

Met zeï tin posik zi modañiz ñaravatak zi tinamed heh, met aban tairap zi pomedez ulov tavat napan-pop pohao het hepan.

Met zi mod named amun heh, met zi pomed aban tairap napanepuh pi tinavor horivoz kapotaz hodad ravat hepan. Zi pomedekaro karar heh. Tahan Oñap God Adamin pot mañah, "Zeï epesiz korav het gogov tohoz. Tat zi uloñ zeï epesik tavat nohoz, oñ zeisiz lopotak zi tinavor horivoz kapotaz hodadevonañamed nek, povoz tinavor horivoz hodad ravat nim zaitivonañ tovai sok, povoz nen okomed tovai ni tavat notun. Met epemedez uloñ nek, povoz ni ñomek." Pot Oñap God mañahan heh.

Met tokaet Oñap God pot homeh, "Abanap pim main hepanezavoz tin naravotü, povoz pinañ karar parup honeo meñizat hepazap meñem." Pot homet anumaihol Adamiz nakoe bat emahan parum abatañ main main Adamih bar mañah, oñ anumai hon nap abanap meñizat parup hepazap bon, povoz Oñap God hahan abanap orah. Tahan pim elap nap batihapuh

elap popunañ pim añap matut tah. Tahan abanap maot bal hahan Oñap God añap bat emat abanapunañ bater batah.

Tahan abanap etet biñ ravat añapun pot mañah, "Ni nem herisinañap Oñap God matut netah, povoz ne nim abatao añap pot nañom."

Met Oñap God abanapuz añap matut tat manah, povoz abanari parum añahol bovai emohot parum nonor pap betet aban napur añap paru her honas ravoh-povoz petev dari am taput tameg.

(Mat.bodor 19:5; Mak.bodor 10:7-8; 1 Kor.bodor 6:16; Ep.bodor 5:31)

Met añarab poñariv barekañariv hehapuh parup tu narav oñ tin heh.

Bodor 3:1-13

Añarab garos hehañariv parup Oñap Godiz ah ñeo ritou tah-ñetio

Met añarab garos hehañariv Oñap Godih zeitinas matut tat parup meñehan heh. Heh-porah Seten pi Oñap Godiz kaev amun heh. Met pi moreg haovai horio ahoam heh. Tahapuh narah pi hamalep ravat sahapuh añapun at mañah, "Oñap Godih arip ziul nañ tavat nainotuz ahao añaha?" Pot at mañahan añap ñet hañio pot mañah, "Deip ziul mapoñ tavat nokaz Oñap God au añah, oñ zi honemedez uloñ deip tavat nainotuz ah ñeo añah. Met tairaiz? Deip tavat nak, ma uturak, povoz ñomak, pot Oñap God deipin añah." (Rev.bodor 12:9; bodor 20:2)

Met pot añap hahan hamalep hatetet ñet moreg epat metah, "Arip nepikepuh nañomotü, oñ arip hodad tinao ma hodad horivoz kapot hodad

tepikepuh Oñap Godiz zut ravepik hezavoz moreg ok aripin añah."

Pot mañahan añap zi pomedez ul tinañ badat hehan pi eteh. Povoz met pi homeh, "Rotap ziul epeñ tavat nakapuh Oñap Godiz zut ravat hodad ahovonañ ravak." Pot homehapuh tavat pi nas nat nas abupuz bihan hehan abup emahan manahan nah.

Tahan parup barekañariv hehao hodad tat tu ravahapuh zi tae ahoñinañ namedez taeñ kolat hariharitakaro rez badat parupim herisikaro akak tat heh.

Met het hatetehan gitap bañodapaz tohan Oñap God zeisik emahan parup hatetet Oñap Godiz ñaihet tat iz ravat heh. Tahan Oñap God parupin at mañah, "Ae, arip taek hez?" Pot mañahan abanapuh hañio pot mañah, "Ne ni emeñin hatetet ne barekap hez povoz nimaz ñaihet tat iz ravat hehö." Pot hahan Oñap God hañio epat mañah, "Met tairapuh ni barekap heñivoz nañahan hodad tat tu raveñ? Evo, met ni zi nem ah ñeo nañohomedez ulov tavat neñ, povoz ni ok hodad teñ, oñ ni nain teñitin hodad narav teñ narab." Pot Oñap God mañahan abanap hañio epat mañah, "Añ epop nioh matut tat naneñipuh zi ulov tavat nahapuh ne nas nanahan noh." Pot hahan Oñap God añaupun at mañah, "Eñarim, ni tai teñ?" Pot mañahan añaup pat, "Hamalepuh ne moreg netahan bat noh." (2 Kor.bodor 11:3; 1 Tim.bodor 2:14)

Bodor 3:14-24

Adamir añaupuz horī tahavoz Oñap Godih hañio kakamao manah-ñetio

Pot hahan Oñap Godih hamalepur abanap ma añaup kakamao manat hamalepun pot mañah, "Nim nekeo orah rezah hamarrah inovai sohoz. Tapanen nim ñaro izar mim ma añaraboz ñaro iz mimihol orah rezah naenap menohot hep. Pot tohopanen añ epopuz ro mimip berevat ni ritou netap." Pot Oñap God hamalepun mañat met añaupun epat mañah, "Ni orah rezah

kakamao hatetet ñarohol bathoz, met nim abup nimaz korav ravat hep. Tapanen ni pim eñatak hapazat tovai sohoz." (Rev.bodor 12:17; Ib.bodor 6:8)

Met abanapun Oñap God pot mañah, "Ni nim añaupuz ñeo baval hat pim marasikanañ zi epemedez

ulov tavat nanahan neñ. Tat nem ah ñeo elat ritou tat horī teñ, povoz hamarrah zenzeneñ ahö berevat hepanen ni gog ahov token nim gipiz ou ravohopanen bat novai sohoz. Met nim heris neoh hamaranañ matut netoh, povoz abao tekepuh ñomat maot hamar rav," pot Oñap Godih abanapun mañah.

Met aban popuz abatao Adam, met abat povoz kapot pot hez, hamar. Met pim añaupuz abatao Iv pot mañah, met abat povoz kapot pot hez, añaraboz non garosikap. Met Oñap Godih Adamir Iv barekañariv het parup tu ravat heh, povoz pi parupimaz zakep tat hehapuh anumaiholoz kosiñinañ parupim dimir tarakü matut tat manah.

Met Adamir Iv Oñap Godiz ah ñeo elah, povoz parupim hehao horī ravah. Met Iden zeisik zi mod named añarab nat orah rezah pohao het hepazamed am heh, povoz parup zi pomedez ulov bat napanepuh

parum horivonañ pohao het hepan hezavoz Oñap Godih zei posik hepazavoz pi kaev ravat parup zei posikanañ ruahan sah. Tahan abarah Oñap Godiz as rohol añeroholoz zut met parum abatao Serab abarahanañ mehan emat met añarab maot kohat poek emat zi uloñ tavat napan hezavoz Iden zeisik korav ravat rouat het en garovonañas bat ñai bit heh. (Rev.bodor 22:14)